

臺灣文獻叢刊第二〇種

臺陽筆記

翟

灝

吳序

臺灣自本朝康熙間始入版圖，又孤懸海外，詞人學士，涉歷者少，間有著爲書者，如季麟光臺灣紀略、徐懷祖臺灣隨筆，往往傳聞不實，簡略失詳。唯藍鹿洲太守平臺紀略、黃崑圃先生臺海使槎錄，實皆親歷其地，故於山川、風土、民俗、物產，言之爲可徵信。然至今又百有餘年矣，時事之因革，俗尚之變遷，宜乎其大有不同者。

翟君笠山，以官斯土也，復著有臺陽筆記一編。因其政之所及者而以言傳之，並因其政之所未及者而以言發之。其間險隘之宜守也，門戶之宜防也，皆能詳度審處，洞達要害。卽士女娛戲之方，飲食嗜好之故，亦莫不示之以節，而制之於微。此豈非以民事爲兢兢者乎？

世有讀書之士，居恒卽以民社自任，及授之以政，非齷齪拘謹，卽操切寡恩；其人之不足與圖治也可知矣。吾讀斯編，吾如見作者之心。吾且願天下之同具是心者，卽奉以爲治譜焉，則陰受其福者，徒此荒濱遠島間而已哉！錢塘吳錫麒撰。

楊序

今夫文以載道，其傳與不傳，蓋視其於道有發明與否，絕非以其騁才華、矜博辯、剪紅刻翠、作錦繡堆也。

笠山翟君，淄川奇士也。博一官，宦遊八閩。在臺陽十餘年，所至有循聲。人咸謂公之才識過人，不知其根柢於學問者，固已深矣。

癸酉冬，余觀察寧夏，與其弟芳南明府適相值。芳南爲余述公之居官行事，並出所著臺陽筆記示余。余朗讀數過，全臺之山川、人物，土俗、民情，歷歷如指諸掌。且十三篇中，濡毫紀事，俱有至理名言，發人深省，所謂道也。公殆本道術爲治術，故其見諸紀載者，詞文旨遠，足以信今傳後歟？余喜公之文與道大，遂援筆而爲之序。

嘉慶癸酉冬日，靜菴年愚弟楊祖淳拜識。

翟序

文在天地，本自然也。日月之運行，山海之奠隴，天地之文，非有心也，但氣化之所充周焉耳。及其在人，觀天文以察時變，而以吾之心究天地之心，即以吾之筆窮萬物之狀，而波折起伏，潑澗盤旋，文極其變，而適如天然之有是文者，斯天下之至文妙文也。故文之佳者，浩氣輔之而行，地之靈者，文思偕之而出；蓋有交相成者焉。

余家笠山，少余六歲，而瓊異奇偉之氣，自其總角時已然矣。未弱冠，卽遊庠，試輒列前茅。讀書偶暇，或解衣磅礴，學技擊舞劍之術，其英資之颯爽，豪情之雄邁，誠有勃然其不可遏者。然嫻詩律，愛吟咏，有香山、東野之趣焉。旣而筮仕閩省，調任臺陽，歷攝縣篆，所治有循聲。間執筆學爲古文，澹宕容與，有紆徐爲妍之致。至於興會淋漓，精神滿腹，流轉生動，則又昌黎所云卓犖爲傑者也。嗚呼！笠山有文如是，是豈獨爲吾家亢宗望，卽梓而問諸世，其亦將有同好也。

夫石鐘有山，遇髯蘇而始得其真；褒禪有洞，得半山而始探其幽。若臺陽孤懸海外，遠隔重洋，周穆馬跡未嘗至，東山展齒未之經，不意得笠山筆記，如置我於海嶼沙島之中，而一一觀其態狀也。是記一出，又不僅置我於沙嶼海島之中，而一一觀其態狀也。臺陽以笠山傳乎？笠山以臺陽傳乎？余不佞，姑俟後之鑒者。

嘉慶辛未花朝前二日，愚兄中策識於平陵縣署之若舫齋。

許序

志物產者莫詳於山海經，而風土或未備也。外此，三都、兩京賦，則風土、產物，詳哉言之，而又非紀載之書。惟范成大之桂海虞衡志，則山川、草木、鳥獸、飲食、衣服、文字之繁賾，無不羅列指數，備載簡編，而文亦古奧。近世所見者，王漁洋之皇華記聞、李調元之粵遊記事、黃崑圃之臺海使槎錄，雖風土、物產，詳略不同，而要皆載一時之見聞，供後儒之採擇；所關匪渺小矣。

淄川翟君笠山，固嘗蒞官臺陽者也。辛未夏季，僑寓京江，出所著臺陽筆記，蓋凡爲文十有四篇。其間爲記者九，爲論者四，爲說者一；而附五言絕句詩則八焉。其物產，則火山、濁水、玉山、蛤仔爛、珊瑚之樹、琉璜之花，譎怪而瑰奇也。其風土，則番錢之狡、鴉片烟之害、聚芳園之幽且淨、以及歸化之生番、漳泉粵莊之義民，奇正錯出而勸戒交深也。而全臺之形勢、弭盜之方略，則又以見慮之深、謀之遠，有發見於楮墨間而不自知者焉。

昔人謂吾儒學道而有所獲，苟得所藉手則施之於當世；不然，則著之書以詔來者。今翟君亦既學道而有獲矣，亦既得所藉手而稍有所施矣，復爲此書，俾後之治臺陽者得以悉其風土而協其機宜，其用心有與王、李諸公之記載，後先一揆者；寧徒如齊諧之志

怪，博異之矜奇，繪可驚可愕之譎狀，聳欲歌欲泣之壯懷，爲能繼虞衡志之恢以博、山海經之奇而神也哉！

憶乙丑夏與翟君相遇於吳門，匆匆別去，未盡所懷。客冬十月，余以公事至平陵，復相遇於李葛峰官署。詩酒唱酬，稍盡所懷矣，亦不久卽別。茲又晤於京江，復唱酬於詩酒者有日。而翌日又聞有吳門之行，旣序是書，而並不能無聚散之感云。

嘉慶辛未巧夕前三日，桐山愚弟許鯉躍春池氏拜撰。

鍾序

昔嘗讀黃崑圃先生臺海使槎錄，其於臺之城邑建置、山川形勢、物產番俗，詳哉其言之矣。

今笠山翟君，以恢恢游刃之才，蘊康濟吾民之略，在臺陽十餘年，耳熟目悉，洞見癥結。復值蔡逆之擾，以文弱書生，而縻鞅袴褶，拒賊鋒於鯨波鼇碕之間。其鬱勃於中，有不能已於言者，隨筆劄記，以十三篇括之。其筆力之矯變宕折，則皆自柳州、廬陵、眉山諸大家陶鎔而出，故令人動盪心目，覽之惟恐其盡也。然言之有物，非浪費楮煤。其於民番之積弊，剔幽發隱，可以醒愚蒙、忱奇袤，可以爲良有司龜鑑，而上達於楓宸，義卓闊矣，與使槎錄並傳可也。

戊辰冬至後三日，歷下退軒弟鍾廷瑛敬序。

王序

文以載道；文者，道之興也。淄川蒲子留仙有誌異一書，事雖荒誕，要借無稽之說，以寓至正之理，其勸懲之微意，未嘗不流露於行間也。故其書至今傳焉。

今翟子笠山，亦淄人也。筮仕閩省，歷官臺陽，所遇山川、景物、風俗、民情，每爲文以紀，名曰臺陽筆記。余讀之，其詞文，其旨遠；其記事也詳，其寓意也深；其感慨指示也，理正而發人深省，雖未嘗襲取左、國、莊、騷之句法，而於唐、宋八家，已寢寢乎入其室矣，與聊齋並傳也。

余與笠山爲莫逆交，囑爲序，余辭不獲，遂爲數言以弁其首云。
歲次己巳桂月望前二日，東武王元鶚撰。

題詞

作宦曾遊大海濤，年逾週甲氣仍豪。霜寒荒島身擒賊，月黑樓船夜帶刀。征戰不煩宵旰慮，勳名早荷聖恩褒。先生事業功成後，垂老歸來脫錦袍。

全臺風景記分明，往事高談四座驚。破敵宛然成老將，論文依舊是書生。寒雲落日還家夢，白髮丹誠報國情。悔不從軍同借箸，讓君滄海著威名。

（丹徒唐培士花城）

要從滄海涉風波，纔算人間閱歷多。剿寇奇功同大樹，論文雄辯等長河。臺陽德政蒼生福，山左清名白雪歌。一自歸來無個事，行踪到處寄吟哦。

（丹徒包禮雲農）

海外歸來解戰袍，南遊到處任逍遙。臨風快讀琳琅句，棠蔭爭傳德政高。

（丹徒劉輝春谷）

海色天風路渺茫，蠻雲犵鳥自成鄉。從今不讀輿圖記，一管生花寫大荒。

蛋雨閩風四十秋，潛蛟宮室蜃中樓。知君碧眼過犀燭，不學詞人記十洲。

（武進管繩萊孝逸）

尺幅居然現巨觀，臺陽隨處助文瀾。名言妙理眞經濟，莫作齊諧志異看。四十年來說宦遊，奇情異彩任探搜。眉山風骨廬陵韻，盡在先生筆底收。溟海蒼茫幾度經，六旬猶未鬢星星。平生多少驚心事，說與常人不忍聽。匆匆相見恨偏遲，同是征帆小駐時。我濫齊竿慚八載，欲從模範證工師。

（桃源袁潔玉堂）

鯤壑橫雲蛋海煙，雙門高削護沙田。乘風少壯功名事，曾在扶桑萬里天。

（丹徒錢之鼎鶴山）

恨幼孤失學，硯食四方，黔南、楚北、西蜀、東吳，問我芒鞋，俱曾踏過。奈筆頭疎嬾，所歷山川，盡如過客。玆於辛未宦遊瀨水，晤笠山先生，把臂談詩，成匝月歡。蒙示臺陽筆記，皆經世婆心，不特吟風弄月而已。然紬繹篇章，全臺在目，離奇兀突，令我消魂。爰綴數言，徒增續貂之恥。

胸中無萬卷，下筆塗來俗未免。足底不千里，眼界難寬井蛙恥。此中至意知者誰，遊子壯夫爲能爲。昨見東魯笠山先生之所作，瓊奇瑰異復磅礴。山水人物一卷裝，驚心炫目說臺陽。媿我饑驅三十年，竟無尺幅描雲烟。今作稗官催軍船，篷牕誦讀、恍如海外雄觀來眼前。

用陶韻又成一首

一見卽心契，關心只在詩。我却寡所諧，惟君獨任之。臺陽十四策，海外寫雄思。雄思何所寄？經濟趁清時。天地逆旅耳，此編傳在茲。雞林走商賈，聲價不人欺。

（姑熟胡 泉者島）

地準三萬六千餘里之程途，耳目未遍心模糊。瑯環石室有丹符，闡微洩秘如畫圖。典墳未考腸已枯，一得臺陽筆記如獲珠。反復玩索，勝覽陸公之書厨。火山、玉山等方壺，嵌奇光怪造化爐。芳園、濁水景氣殊，豔冶離奇超寰區。石礁鐵沙多憂虞。澎湖燦爛撐珊瑚。番錢妙巧誇錙銖。鴉片名煙法當誅。蛤仔爛地稱膏腴。琉球使過船吹竽。八尺門經五色驅。金包穴吐硫磺酥。漳泉粵莊爲德隅，義民疊出看于于。吁嗟兮長吁！觀此一卷無多猶截蒲，胡以奇山異水能橫鋪？風土人物隨心摹，經濟中藏名言俱。斯編作

者問誰乎？東魯昔任東寧之老儒。

（于湖胡森）

捧讀臺陽記，欣然具大觀。草花香最古，山水象難刊。經濟胸中透，紛華眼界寬。世情兼治策，敢作異書看。

（姑溪胡士勳銘齋）

奇事奇文非浪傳，烏頭馬角亦茫然。須知六合八荒外，澤譜山經載未全。宦海行踪信不虛，煙波淼淼竟何如。香山詩句臨川筆，盡在臺陽一卷書。

（同邑王驥槐莊）

卿雲現海捧輪紅，金船獻壽波不鴻。君家東海我南海，天風海水論心胸。君昔携琴閩海上，絃歌雅化時無兩。臺陽深入靖鯨鯢，共叱文壇出飛將。運爾烹鮮手，助彼屠鰲刀。報最循良卅六年，島嶼形勝悉推測。鬼蜮射影蚊浮塵，筆光四照無遁形。鸞粟布地金易土，丹爐煉永鉛成銀。硫磺花、珊瑚樹，蛟宮龍窟乘雲霧。陰火潛燃玉水流，探奇更補木華賦。赤文綠字滿瑤編，健筆勘破西南天。直以文章爲經濟，豈徒月露誇連篇？

年未及懸車，慨焉思投幘。紐蘭不數河陽花，歸舟惟戴鬱林石。爲訪名勝遊三吳，青天萬里來吾徒。高山流水知音少，安得與君共範模。入座雄談揮玉麈，海月東升夜方午。敢將秃筆爲題詞，附名我亦傳千古。

（嘉興朱錦華尙齋）

卅載臺陽記，千秋吏治關。運籌經口岸，持論抵眉山。壯志凌烟上，儒臣賦槩間。去思碑並讀，應望使車還。

（慈水葉芬誦清）

閩嶠儒官四十年，臺陽風土一編傳。都關國計民生事，莫擬虞衡志異篇。書生敢上防邊策，草莽難忘靖海功。讀罷奇文空眼界，鷺門關鍵在胸中。

（桐山姚長煦浣江）

臺陽筆記目錄

全臺論	（一）
粵莊義民記	（三）
嘉義縣火山記	（五）
生番歸化記	（七）
聚芳園記	（九）
聚芳園八景	（一一）
濁水記	（一三）
倭硫磺花記	（一五）
漳泉義民論	（一七）
番錢說	（一九）

玉山記·····	(二一)
蛤仔爛記·····	(二三)
鴉片煙論·····	(二五)
弭盜論·····	(二七)
珊瑚樹記·····	(二九)
附：閩海關見錄·····	(三一)

臺陽筆記

淄川翟灝笠山撰

全臺論

山川之形勢，人事之規畫，有極安而極危、似密而實疏者，臺灣是已。

夫臺灣一郡、四縣，負山面水，外有口岸之險，內有甲兵之設，說者謂『磐石之安，金湯之固，不是過也』。余曰：『不然』。

夫水以載舟，水到之處，卽舟到之處。水有淺深，舟有大小，不能限也。或曰：『水之下有暗礁焉（石藏水底，鋒利無比，名曰暗礁），有鐵板沙焉（沙色如墨，性堅如鐵，名曰鐵板沙），無論艤艫快艇，觸之卽碎而無復存者』。然此說也，可以嚇商賈之所未經，而不能難土人之所習慣。沿海居民，捕魚爲業，當風浪怒湧之時，而談笑自若。何者？習熟之使然也。若淺若深，瞭如指掌；而何有於沙石？故洋匪之出入，必藉土人以引之。蔡逆之來，木城之失，其明徵歟（過巡道置木城三座於鹿耳門，蔡牽入而焚之）！

又或曰：『有口岸在，設重兵以守之，嚴其防而禦之，則有備無患』。余曰：『誠是也。然其患卽伏於此，而莫之覺也矣』。